

LA JUNA BATALANTO

Organo de la Internacia
Katolika Junulara kaj Paca Movado

ELDONATA DE
MONDJUNULARO KATOLIKA, MOKA

Redaktoro : WILHELM SOLZBACHER.

ENHAVO :

P. Erich Przywara, S. J., La spirita situacio de nia tempo kaj nia religia misio. — Marc Schérer, La labora vivo. — Willy Flammer, Praktika preslaboro de svisaj studentoj en la Katolika Agado. — Hina MOKA-komitato. — W. S., Pri la eksterlanda kaj paca agado de la anglaj katolikoj. — El la lando de la Internacia Eŭkaristia Kongreso — Venu al Budapeŝt! — Wilhelm Solzbacher, Taskoj kaj eblecoj de internacia kunlaborado de la katolika junularo. — Pastro D-ro Carl Sonnenschein, Liberan straton, ankaŭ por ni! — Spegulo de la tempo (« Sendiaj infanoj en Rusujo — Vivu la milito? — La flava danĝero — Persekuto de la religio en Rusujo.) — Gravaj internaciaj kongresoj kaj kunvenoj 1930. — Jubilea Kolekto por J. B.

REDAKCIO : Köln, Dagobertstrasse, 28, Germ.

Eldonejo : ELDONA KOOPERATIVO LA JUNA BATALANTO,
Köln—Dellbrück, Bensberger Marktweg 53, Germ. (Regina Reiff).

Abonprezoj de "La Juna Batalanto"

Normala abonprezo : jare 2 germanaj markoj, kun MOKA-membreco 3 M. La eldonejo akceptas monbiletojn, ĉekojn, poŝtmandatojn, respondkuponojn, germanajn poŝtmarkojn.

Lando	jara abono	kun MOKA-kotizo	simpla kotizo	Lando	jara abono	kun MOKA-kotizo	simpla kotizo
Anglujo	2 s.	3 s.	1 s 3 d.	Hungarujo	2,4 p.	4 p.	2 p.
Argentino	1,50 p.	2 p.	1 p.	Italujo	9 l.	14 l.	5 l.
Azio	2 s.	3 s.	1 s 3 d.	Japanujo	2 s.	3 s.	1 s 3 d.
Aŭstralio	2 s.	3 s.	1 s 3 d.	Jugoslavujo	30 din.	40 d.	15 d.
Aŭstrujo	3,40 s.	5 s.	2 s.	Litovujo	5 lit.	7 l.	3 l.
Belgujo	3,50 b.	6 b.	2 b.	Luksemburgo	18 fr.	25 fr.	10 fr.
Brazilio	4 mr.	5 mr.	2 mr.	Meksiko	0,50 dol.	0,75 d.	0,30 d.
Ĉeĥoslov.	14 kr.	20 kr.	10 kr.	Nederlando	1,25 fl.	2 fl.	0,80 fl.
Danujo	2 kr.	3 kr.	1 kr.	Polujo	4 zl.	6 zl.	3 zl.
Danzig	2 g.	3 g.	1,20 g.	Portugalo	8 esc.	12 e.	5 esc.
Francujo	12 fr.	18 fr.	6 fr.	Rumanujo	80 lei.	100 l.	40 lei.
Germanujo	2 M.	3 M.	1,20 M.	Svedujo	2 kr.	3 kr.	1 kr.
Grekujo	38 dr.	50 dr.	15 dr.	Svisujo	2,50 fr.	4 fr.	1,50 fr.
Hispanujo	3 p.	4,50 p.	2 p.	Usono	0,50 dol.	0,80 dol.	0,30 dol.

Ni akceptas ankaŭ pagojn por duona jaro aŭ kelkaj jaroj. Membroj de MOKA ricevos nian jarlibron kaj aliajn publikigaĵojn. Donacoj por la subtena kazo (liverado de J. B. al malriĉuloj) estas invitataj.

Abonejoj : Krom al la eldonejo oni povas ankaŭ pagi al la naciaj sekretarioj de MOKA, kies adresojn vi trovas en alia loko de la gazeto.

Poŝtkontoj. Germanujo : Köln 480 37 (Wilh. Solzbacher, Köln) ; Francujo : Strasbourg 8180 (P. I. A. Muffang, Bourg-la-Reine) ; Aŭstrujo : Wien D 30461 (Ernst Gœrlich, Wien 3).

POR PROPAGANDI NIAJN IDEOJN en la katolika junularo tutmonda, MOKA eldonas propagandgazetojn nacilingvajn. Ili devas enpenetri ĉie en la rondojn kaj asociojn. Ĉiu propagandisto portu daŭre kvanton en sia poŝto, por disdoni aŭ disvendi ilin.

« **ERWACHENDE JUGEND** » nomiĝas la **germanlingva** bulteno aperanta dumonate. La propaganda eldono B (eldono A aperas en formo de revuo) kosta nur **po 3 fenigojn**; sed oni forsendas nur minimume 25 ekzemplerojn. Mendu !

« **JEUNESSE MONDIALE CATHOLIQUE** » estas destinata por niaj **franclingvaj** amikoj kaj kosta nur **1 francan frankon** por 10 ekz., 4 fr. por 50, 7 por 100 ekz. Mendu tuj !

En angla kaj hispana lingvoj similaj bultenoj estas nun preparataj. Interesuloj jam nun mendu ĉe la Eldona Kooperativo J. B. aŭ ĉe la kompetenta nacia sekretariejo.

La spirita situacio de nia tempo kaj nia religia misio.

De P. Erich Przywara S. J.,

Resumo de lia parolado en la jara kunveno de la Katolika Junularo de Germanujo en Altenberg.

La situacio de nia tempo estas influata de la movadojaroj inter 1922 kaj 1926. Tri vortoj karakterizas tiun tempon : objektivismo, komuneco, religio.

La **objektivismo** signifas, ke nia pensado, en kontrasto al la opinio de Kant, estas denove pensado al objektoj; tiel Husserl kaj Max Scheler kiel filozofoj, tiel Stefan George kiel poeto. En la katolikaro la objektivismo montriĝas en la liturgia movado. Tie oni ne pu rigardas al la malgranda « mi », sed al la granda objektivo, al Dio. Oni turnas sin al la objektiveco de la dogmoj, en la preĝado oni rigardas for de si mem al la altaro. Tiusence ĝi estis kaj estas turniĝo al la katolikeco. Sed aliparte la impulso, por rigardi en la vastecon de la senfino, fariĝas antaŭenpuŝanta movado por la movado mem. Ĝi fariĝas dinamismo.

La dua karakteriza signo de la movadojaroj estas **komuneco**. Komuneco estas la vorto de la sociologioj de Max Scheler kaj Othmar Spann. Ĝi estas la celo de la junulara movado. Ĝi estas la senco de la liturgia movado : la « Ecclesia orans », la preĝado de la komunumo de la mistika korpo de Kristo. Tiusence ĝi estas turniĝo al la katolikeco. Sed aliparte oni diras en tiuj movadoj : komuneco ne estas organizo, komuneco radikas en la unufojeco de la sincereco inter « mi » kaj « vi ». La komuneco fariĝas fluanta vivo. Movado estas kiel movado pro la movado. Ĝi fariĝas **dinamismo**.

La tria vorto de la movadojaroj estas **religio**. La objektiva pensado fariĝas submetiĝo al la realecoj. Submetiĝo al la realo fariĝas submetiĝo al Dio : obo de la kreitaĵo al Dio. Tiel por Karl Barth religio estas tio, kio « ne estas utila por io », ĝi estas celo en si mem. Oni ne demandas, kion oni profitas de Dio. Kion oni faras, tion oni faras pro la honoro de Dio. Ankaŭ ĉi tie fariĝas turniĝo al la katolikeco. « Mundus creatus est ad gloriam Dei », « la mondo estas kreita por la gloro de Dio ». Tio estas la patoso, kiu konstruas katedralojn, tute egale, ĉu ili estas « utilaj » al io. Sed aliparte tiu direkto parolas strangan « ne » kontraŭ la videbleco de Dio en Lia Eklezio. La patoso de la honoro de Dio fariĝas militatako kontraŭ Lia Regno sur la Tero. La nevidebleco de Dio fariĝas gvidanta ideo de religia-radikala dinamismo. La dinamismo jam supre nomita ricevas sian plej altan formon : ĝi fariĝas absoluta en « dinamismo kiel religio ».

Tiu absoluta dinamismo estas dusenca. Ĝi estas **teknika** dinamismo kaj **nihilista** dinamismo. La unuan simboligas Ameriko, la duan Rusujo. La hodiaŭa **tensio** estas **inter Moskva kaj New-York**. La teknika dinamismo estas karakterizata per la hegemonio de la maŝino. La maŝino

estas spirita principo : en la simbolformo de la usona City. Ĝi estas io titane granda. Sed, kion ni samtempe sentas en tio, estas dissolvo. Ni ne sentas, kiel ni estas **apud** la maŝino, sed kiel ni estas **en** ĝi kaj jam parte **sub** ĝi. Ĉi tie montriĝas la interligiteco kun la nihilista dinamismo : kun la radikalismo de la rusa sindono-patoso. Ĝi neniel interesiĝas pri la gardado de la individua homo, ĝi postulas senindulgan sindonon. Ĝi estas plenumo de Karl Barth : aktiva radikalismo. La homo estas destinita al tio, ke li estu starigata en la ventegon, kiu lin dispecigas. Homo staras inter Dio kaj diablo. Teknika kaj nihilista dinamismo trapenetras unu la alian. Tio montriĝas en la hodiaŭna arkitekturo : la senindulge pura objektiveco de la konstruado, sed en ĝia nuda vasteco la demoneco de la rusa ebenaĵo. Tio montriĝas en la hodiaŭna muziko : pura diatoniko, kiu tiom malmulte emas konsideri flatantan belsonecon, ke ĝi estas atonala, — sed en la malvarma intertrancigo de tiuj atonalecoj la tranĉanta potenco de la mondjuĝejo. Tio montriĝas en la hodiaŭna filmo : la senekzempla teknika perfekteco de la rusaj filmoj, sed en la profundo de ilia historio la flamanta demoneco. Tio montriĝas plej akre en la tragiko de la hodiaŭna virino : disŝirita inter la amerikana girl-tipo kaj la tipo de la demonaj dancoj de Mary Wigman.

Kio fariĝos? Tio estas alia demando, kiun mi nun ne volas respondi. Sed certe estas, ke en ĉi tiu eshatologia situacio ni povas kanti Tedeumon. Ĉar ĝi postulas tion, kio estas skribita laŭvorte en la Evangelio kaj en la Leteroj de Sankta Paŭlo : **senindulgan kristanecon**. Bapto estas starigiteco en eshatologian situacion : « Mortui estis in Christo », « vi estas mortintaj en Kristo »! Sed ne mortinteco kiel ripozado, sed kiel aktiva mortado en Kriston, ĉinstarigiteco en **Lian Savotaskon** en la Eklezio.

Malĝusta reago al la situacio estus la malespero, kiu vivas en la multaj hodiaŭaj psikozoj kaj neŭrozoj. Ĉar esenca en la « mortado » ne estas la negativo, sed la pozitivo, kiu troviĝas en la **misio de la kristano**. Ĉi tie montriĝas kristana objektiveco. « Mi ne estas el la mondo, sed mi estas sendita en la mondon ». La patoso de la mortinteco fariĝas kristana ago-forto. Esti martiro, signifas, **atesti. Ĉesas multagema, kompromisa kaj adaptiĝa katolikismo. Estiĝas katolikismo de la mortoforto.**

La senco de la amerikano estas la City, la senco de la ruso estas la Mesio-senditeco de Rusujo, en la spirito de Dostojevskij. La senco de la kristano estas **la plenumo de la volo de la nevidebla Dio** en la situacio de Golgotha. Temas pri tio : « Christo confixus cruci ». Kun Kristo mi estas alkrucigita. —

« SENDIAJ » INFANOJ EN RUSUJO.

En Odessa okazis la unua kongreso de la infanoj organizitaj per la « sendiuloj », kun la celo, plifortigi la kontraŭreligian propagandon inter la infanoj. Estas transportitaj al tiu kongreso pli ol 500 infanoj 10-14-jaraj el plej diversaj lokoj de Ukrainujo, kaj antaŭ ili la lokaj agitantoj faris kontraŭreligiajn paroladojn, insultante la religion kaj kalumniante la pastraron. La kongreso — informas Ofinor — elektis konstantan infankomitaton kun sidejo en Odessa kaj decidis, anigi al sia asocio en ĉi tiu jaro almenaŭ 50 procentojn de la ukrainaj infanoj. La kongresraporto estos publikigata en kvin lingvoj kaj sendata al ĉiuj lernejoj de la lando.

Laŭ « Osservatore Romano », Vatikano.

La Labora Vivo.

De **Marc Schérer**, membro de la ĝenerala komitato de la Franca Katolika Junulara Asocio (A. C. J. F.)

La brile sukcesinta kongreso de la Franca Katolika Junulara Asocio, okazinta 24-28 aprilo en Nancy, pritraktis la aktualan problemon de la « labora vivo », esplorante ĝin laŭ la diversa situacio por la laborista junularo, la junaj kamparanoj kaj la studentoj. Ni represas el la kongresa ĵurnalo artikolon de Marc Schérer, kiu ŝajnas al ni grava kaj interesa por la katolika junularo tutmonda.

RED.

Multegaj homoj dediĉis sian vivon al la realigo de la **kristana socia ordo**: **aliaj**, kontraŭe, parolas pri la **klasbatalo**. Tiel jam en la vortoj vidiĝas la socia konfuzo, en kiu ni vivas. La ordon, pri kiu kelkaj tiel fervore laŭdkantas, kie do, mi petas, oni rimarkas ĝin en nia socio donita al la ofte mortiga interpuŝadode antagonistaj « klasoj », kie sin puŝas ne nur kontraŭaj ekonomiaj interesoj, sed ankaŭ vivkonceptoj neinterpacigeblaj. Tia situacio metas urĝegan problemon antaŭ la kristanojn...

Sekve de la kreskanta specialigo de la tekniko (kiu evidentiĝas de la industria raciigo ĝis la limigo de la scienculo al ciklo de difinitaj fakaj studoj) nia socio sin trovas dividita en certan nombron da **sociaj klasoj**, kies ĉiu havas sian propran vivon kaj specialan mentalecon. Aŭ, se oni volas, kreigiĝis certa nombro da **labor-kaj vivmedioj**, en kiuj la individuo devas vivi, ne trovante ekzistokondiĉojn memelektitajn.

La « klaso » do estas fakto en nia socio, kaj sendube oni povas diri, ke tiuzure, ke la malsameco de la socialaj funkcioj kaŭzas la malsamecon de la vivmanieroj, tiu malsameco de la klasoj estas sendanĝera neceso; sed la klasdivido fariĝas fiuzo kaj eksceso, kiam la malsameco de la vivmedio kaŭzas reciprokan malkomprenon kaj kaŝitan aŭ evidentan malamikecon.

Estas do devo de la kristanoj, serioze okupiĝi pri tiu neevitebla problemo de la klasoj. La tasko de nia kongreso en Nancy estas, esplori per skrupulemaj kaj kuraĝaj analizoj, kiel el tiu necesa malsameco devos estiĝi la harmonio nepre postulata per la kristana doktrino.

Precipe mi deziras atentigi pri ideo, en kiu oni tuj ekkonos la direktantan ideon de la kongreslaboroj. **Tio, kio kreis la socian konfuzon kaj malordon, en kiu ni vivas, estas malpli ekonomia krizo kaŭzita per difekta organizo de la ekzistobonoj, ol difekto en nia civilizo mem.** La ideo ne estas nova; jam antaŭ longa tempo la « Syllabus » de Papo Pio IX-a kondamnis tiun senhontan manieron, identigi la kristanismon al la moderna civilizo. Tiu, kiu observas per kristanaj okuloj, ekkonas, ke la tuta atmosfero de la jarcento estas venenita, tiel ke estas tute aŭ preskaŭ neeble, pensi kaj vivi kristane, tiel ke eĉ la hipotezo de kristana solvo de la krizo, je kiu ni suferas, estas malebla.

Kia do estas tiu fundamenta difekto? Ĝi konsistas en tio, ke ni vivas en epoko, kiu el la mono faris al si idolon kaj el la komforto moralon, kaj en kiu tiuj, kiuj laŭ sia diro tenas la spiritan kulturon, fariĝis tro fieraj pri tio. De tio venas la baro inter la « kleruloj » kaj la popolo. Kaj krome la monduma kulturo, per kiu tiuj « mondumuloj » sin ornamis, eĉ volis adapti la religion al sia monduma civilizo. Sed nenia kultura formo povas esti prava kaj justa, se ne kiel funkcio de la religio kaj por esti helpilo de la Savo. Ĉu estas surprize, ke en tia kultura situacio estiĝis disigo inter la « granduloj » de la kulturo kaj la popola klaso? Kaj kiel tiu laborista klaso estus povinta akcepti religion mondumigitan, kiu ne plu ŝajnis farita por ĝi? Kiel la « servaj » laboroj de la laborista klaso ne estus devintaj aperi kiel mizera penado, dum ke la kuranta kaj oficiala opinio malestimadis pli aŭ malpli konscie ĉion, kio ne estis « liberalaj karieroj »? Alivorte, kiel la laboro de la laboristo ne estus malplenigita de ĉiu spirita enhavo, de ĉiu idealo? Kiel ĝi estus povinta konservi en senekvilibra civilizo la valoron, kiun donis al ĝi la kristanismo? Fine, kiel la laboristo en sia labora vivo estus povinta ne senti sin diferencigita de la « alia klaso » kaj baldaŭ kontraŭa al ĝi?

Oni vidas, kiel la problemo de la labora vivo estas profunde kunligita kun la pli vasta kaj pli terura problemo de **plena transformado de kulturo, kiu fakte montriĝas kiel antitezo de la vivo de la amasoj!**

La kongreso de la franca katolika junularo en Nancy ne povas elĉerpi tiun gigantan problemon, kiu juĝas la tutan civilizon, en kiu vivi centjaroj da kaŝita idolanismo nin kutimigis; devos sufiĉi analizi kelkajn ĝiajn esencajn aspektojn, por montri, en kiu senco ĝi postulas vere kompletan ordigon de nia socio.

Se do estas vere, ke tie kuŝas la sekreto de la klasantagonismoj, ĉu tiam ne estas devo de la kristanoj, esti la unuaj por ekzameni tiun situation? Ĉar ĉu ili ne devas havi pli ol la « aliaj » la zorgon pri la unueco kaj harmonio en socio de justeco kaj amo? Ĉu ili devas retiriĝi antaŭ iuj konstatoj, eĉ se ili riskas malplaĉi al facilanimaj kutimoj aŭ al danĝeraj antaŭjuĝoj? Se estas necese, forlasi iujn ideojn, kiuj de longa tempo venas la atmosferon de la labora vivo de iu « klaso » aŭ de iu « medio », oni nur devos aŭskulti la neŝanĝeblajn postulojn de la **kristana doktrino, kiu neniam transformiĝos, por plaĉi tiujn, kiuj ne volas servi ĝin, sed servigi ĝin.**

Celo de nia kongreso estas, alporti kelkajn klarajn ideojn en la komplikitecon de la demandoj, en kiuj la ekonomiaj postuloj de la laborista klaso kaj de la kamparana mondo komplikiĝas al doktrina-morala demando, kiu problemigas la sencon de **ĉiuj « klasoj »**. De ĉiuj tiuj klasoj, kiuj devas lerni la spiriton de la kunlaboro, en kiu ni dezirus povi baldaŭ saluti anoncon de la kristana socio!

ALIGU AL MOKA! Akceptu la oficon de Delegito! Fariĝu pioniro de la internacia katolika junulara movado!

SPECIMENAJ NUMEROJ de J. B. estos sendataj senpage al la adreso de seriozaj interesuloj, kiujn vi sendos al ni!



Ekzekutiva Komitato de la ĥina nacia sekretariejo de MOKA.

1. Pastro Joh. Eŭpt. Kao, O. F. M., nacia sekretario; 2. Aloizio Li, konsilanto; 3. Jozefo Lou, verkanto de gazetartikoloj; 4. Jakobo Tung, enlanda korespondanto; 5. Odoriko Li, gastogvidanto; 6. kaj 7. Jozefo Chang kaj Paŭlo Li, eldonantoj. La samideanoj Atanzio Li, financisto, kaj Liui Yu Chen, protokolisto, ne ĉeestas. — Ni ĝojas prezenti nian ĥinan MOKA-sekretariejon al nia anaro tutmonda. Ilia agado estas vere admirinda kaj — imitinda!

Praktika preslaboro de svisaj studentoj en la KATOLIKA Agado.

De Willy Flammer, stud., Del. de MOKA, Stans, Svisujo.

Ĉiam, ĉie kaj ĉiel aŭdiĝas hodiaŭ la parolo: Katolika agado. Sed bedaŭrinde — preskaŭ ĉiam, preskaŭ ĉie kaj preskaŭ ĉiel tiu-ĉi parolo restis nur vorto; ne sekvis la faro. El « Katolika agado » estiĝis « Katolika vortado ». Tion ankore pripensante kelkaj svisaj studentoj — idealistaj kaj optimistaj — decidis praktike labori sur unu kampo de la Katolika agado, en la katolika gazetaro. Plej grava por la venko de la ideo katolika estas la presajaro — la katolikaj gazeto kaj libro.

Grandega malhelpaĵo por la disvastigado de la bona broŝuro katolika estas ĝia prezo. Ĉion donacatan oni akceptas; aĉeti oni ne emas, se la aĉetotaĵo ne havas « praktikan » valoron. Precipe malriĉuloj — sed ankaŭ riĉuloj — volonte legas bonan libron, povante akiri ĝin senkoste. Pro tio ĉia popolkleriga broŝuro, kiu devus trapasi multoblan, mil-miloblan eldonon, ne sukcesas. Proporcie malmultaj ĝin aĉetas kaj legas. Ne dekonon ĝin legas, precipe ne tiuj, por kiuj la libro estas skribita.

Kiamaniere ni sukcesas disdoni broŝurojn senkostajn — unika vojo, sukcese enirigi la broŝuron en ĉiun familion katolikan?

La antaŭe nomitaj studentoj, travivinte romantikan antaŭhistorion, kunigis celante la produktadon de senkostaj broŝuroj per propra manlaboro. (La nomo de ĉi tiu estas: Sylvania). Post longa monkollektado

ili aĉetis presejon. Ĉiu studento promesis dum libertempo labori ses tagojn en la presado de la broŝuroj aŭ pagi egalvaloron-25 Fr.

Oni sukcesis pagi la paperkostojn per reklamanoncoj sur la kovriloj, per la kotizoj de membroj pasivaj kaj per maklerado de presaj- kaj libromendoj. Sub aŭtoritata gvidado tiu studenta institucio jam bone funkcias. Multaj studentoj travivas libertempe ĝojplenajn tagojn en kuna laborado kaj kuna amuzado postlabora. Jam kelkajn broŝurojn (kiujn zorge elektas komisiono) ili presis kaj dissendis tra tuta Svislando. La svisaj pastraro kaj klerularo simpatie kaj favore observas la unuajn sukcesojn de tiu ideala perstudenta efektivigo de la Katolika Agado. —

Ĉu ni ne trovus ilojn kaj vojojn, sammaniere utiligi niajn fortojn por la katolika junulara movado internacia? Ĉu ni ne rikoltus egajn, mirigajn sukcesojn, se ni povus disdoni senkostajn propagandilojn, nacilingvajn bultenojn ktp? Se ni povus periektigi nian dumonatan organon, ne farante ĝin pli multekosta? Riĉuloj neniam kuraĝas idealan entreprenon. Idealistoj ĉiam devas finance batali. Ankaŭ la svisaj studentoj ne estas riĉaj — tamen ili sukcesis. Kie estas volo, tie estas vojo. Kiu intensa pensulo eltrovas eblecojn? Moka certe ĝojus! —

La katolika paca movado en la landoj de la mondo

Ni komencas artikoloserion, kiu donos sisteman superrigardon pri la katolika paca movado en la diversaj landoj. Ni jam nun volas konstati, ke la kontakto inter la movadoj diverslandaj estas ankoraŭ malbona. MOKA estonte okupiĝos serioze pri ĝia plibonigo. RED.

I. Pri la eksterlanda kaj paca agado de la anglaj katolikoj.

La karaktero de la angla popolo estas — en tio konsistas ĝia forteco kaj ĝia malforteco — tre malsimpatia al abstraktaj idealoj kaj ĝeneralaj programoj. Ĝi ĉiam prenas la proksimajn, la realajn aŭ baldaŭ realigeblajn aferojn. Do ankaŭ la katolika paca movado, kiu antaŭ ses jaroj enpenetris en la landon, devis adaptiĝi al tiuj antaŭkondiĉoj. Patro **Martindale S. J.**, unu el la plej eminentaj anglaj gvidantoj katolikaj, rakontas en la februara numero de la belga gazeto «La Terre Wallonne», kiel li tiam sentis sin devigata, verŝi malvarman akvon en la entuziasman flamon de la pioniroj plej altajn celojn proklamantaj. Li faris al ili jenajn praktikajn proponojn :

« Unue vi devas zorgi, ke la anglaj katolikoj iomete interesiĝu pri la statoj en aliaj landoj. Vi povas trankvile bazigi vian agadon sur la fakto, ke la katoliko en nia lando konas nur tri aferojn ekster Anglujo : Lourdes, ĉar li tien pilgrimas; Romon, ĉar tie loĝas la papo; kaj Jerusalemon, ĉar tie antaŭ longaj tempoj okazis multaj aferoj kaj ŝajnas, ke tiu urbo eĉ hodiaŭ ankoraŭ ekzistas. Vi devas doni informojn pri la diversaj landoj, pri iliaj statoj, iliaj problemoj, ilia katolika vivo, kaj en tio ĉiam akcenti la bonon kaj neniam elparoli ofendan, jaluzan aŭ malŝatan vorton pri ili. Kaj ne lastu vin tenti vidi la bonon malpli en tiuj landoj, kiuj estas al vi malsimpatiaj aŭ kiuj estas tielnomataj « malamikaj » landoj. « Se vi amas nur tiujn, kiuj vin amas, kaj bonfaras nur al tiuj, kiuj la samon faras al vi, kiel do vi tiam estas aliaj ol la idolanoj? » Tio postulos multajn oferojn de vi. Sed ĝi estos vere kristana agado. Tio longe ke ne ekzistas publika opinio kaj bona volo rilate al la aliaj nacioj, ĉia teoria habilado restos en la aero. »

Kaj fakte la movado sukcesis ĝuste per tiaj metodoj. Jen mi volas mallonge skizi ĝian historion.

En oktobro 1923 renkontiĝis en Reading (inter London kaj Oxford) kelkaj gvidantaj katolikoj, kiuj estis konvinkitaj, ke estas unu el la plej aktualaj devoj de la katolikoj, labori por la paco inter la nacioj laŭ la katolikaj principoj kaj la direktivoj de la lastaj papoj. Ankaŭ ĉeestis kelkaj katolikoj el aliaj landoj, inter ili Prelato D-ro Giesswein el Budapeŝto, la mortinta honora prezidanto de MOKA. La konferenco de Reading akceptis direktivojn, kiuj difinis la celon de la movado : kapabligi la katolikojn, efike realigi la papajn direktivojn por la efektivigo de la Paco de Kristo en la Regno de Kristo. En kunlaboro kun la angla episkoparo kaj kun preskaŭ ĉiuj katolikaj organizaĵoj de Anglujo, Kimrujo kaj Skotujo tiam estas fondita la « **Katolika Konsilantaro por Internaciaj Rilatoj** » (« Catholic Council for International Relations »). La prezidantecon bonvolis akcepti **Lia Kardinala Moŝto Francis Bourne**, ĉefepiskopo de London-Westminster, persone, la 18 plej gravaj katolikaj asocioj (inter ili la Virina Ligo, la Junvira Asocio, la Studenta Asocio, la Katolika-Sociala Gildo, la Misia Asocio, la Kuracista Gildo, la Teatra Gildo, la Kavaliroj de Kolumbo) estas reprezentitaj en la estraro. Unue sekretario estis Kapitano Epstein, la nuna sekretario estas la juna, sed fervora **Earl of Iddesleigh** (74, Victoria Street, London S W 1).

Ekzistas individuaj kaj asociaj membroj. La unuaj pagas jarkotizon de 5 ŝilingoj, la lastaj de minimume 21 ŝ. Inter la asociaj membroj troviĝas lernejoj ĉiugradaj (inter ili ĉiuj instruistaj klerigejoj), paroĥoj kaj muzeoj. Ĉi tiuj asociaj membroj rajtas ricevi senpagan paroladon de paroladisto sendita de la centroj, — certe tre efika kaj por ĉiuj interesitoj tre agraba institucio, kies enkondukon mi rekomendus ankaŭ por aliaj landoj. — Oni multe okupiĝis pri la **pedagogiaj** problemoj. Por ĉiuj anglaj lernejoj la registaro ordonis instruadon pri signifo kaj labormaniero de la Ligo de Nacioj. La Katolika Konsilantaro por Internaciaj Rilatoj eldonis specialajn studseriojn por katolikaj lernejoj kaj ĝinstruistoj, provante krei per tio kontakton inter la ĝenerala instruado pri la Ligo de Nacioj kaj klerigo pri la Katolika Eklezio kiel eklezio universala, pri la historia signifo de la papoj por la internacia paco kaj pri la paca ideo religie bazita.

La Konsilantaro eldonas kvaronjaran informbultenon « A Catholic survey » (« katolika superrigado »). Ankaŭ pri eldono de katolika paca literaturo la movado okupiĝis. I. a. ĝi eldonis la libron « la katolikoj kaj la paca problemo » de P. Keating S. J. kaj la broŝuron de la irlandia jesuito Brown « la katolikoj kaj la Ligo de Nacioj », krome ĝi subtenis la eldonon de la tutmonde famkonata libro de la germana katolika pacifista gvidanto P. Franciscus Maria Stratmann « Tutmonda Eklezio kaj Tutmonda Paco ».


Multaj kunvenoj kaj demonstracioj diskutis temojn kiel « Papo, Eklezio kaj tutmonda paco », « la reĝeco de Kristo kaj la paco », « milito aŭ paco? », « la Ligo de Nacioj », « la internacia kunagado ». Oni interrilatigis eksterlandajn katolikojn kun anglaj samkredanoj kaj zorgis pri la reprezentado de Anglujo en internaciaj katolikaj kongresoj, ekz. de IKA, de la Unuigo de Studoj de Fribourg ktp.

1925 la Konsilantaro organizis en Oxford kune kun la intertempe bedaŭrinde mortinta Internacia Oficejo de Katolikaj Organizaĵoj en Romo, kun la Internacia Katolika Ligo IKA kaj kun la « Union d'Etudes » grandan Internacian Katolikan Kongreson kun ĉeestantaro el 28 landoj de ĉiuj kvin kontinentoj. Tiam la skribinto de ĉi tiu artikolo havis la plezuron, en la fina kunveno de la kongreso esprimi al la Katolika Konsilantaro por Internaciaj Rilatoj dankon kaj admiron pri ĝia agado.

Ankoraŭ pri du praktikaj helplaboroj el la du lastaj jaroj mi volas mallonge raportiti. Dum la plej terura tempo de la persekutado de la katolikoj en Meksikujo la Konsilantaro okazigis grandan nombron da informkaj protestdemonstracioj. Kaj 1928 oni faris sukcesan monkoklekton, kies rezultajo estas transdonita al la Apostola Delegato por Albanujo, por helpi la viktimojn de la malsatokatastrofo en tiu lando. W. S.



Preĝo en la dezerto.



Ĉe la bordoj de la Oued.

EL LA LANDO DE LA INTERNACIA EUKARISTIA KONGRESO.

La afrika urbo Kartago (Carthage), iam centro de prosperantaj kristanaj komunumoj kaj agadejo de la granda episkopo Sankta Augustinus, sed de 1400 jaroj rabo de la islamo, vidis en majo nunjara la grandiozan demonstracion de Internacia Eŭkaristia Kongreso brile sukcesinta. Tiu lando de la « moderna » sanktulo Augustinus, kiu ja devis trapasi similajn religiajn kaj moralajn konfuzojn kaj tentojn, kiel granda parto de niaj nuntempaj gejunuloj, nun estas dezerto mahometana; sed ni esperas, ke iam « la dezerto ekfloros » kaj la kristana Afriko de la martiroj kaj sanktuloj reviviĝos el siaj tomboj. Ni salutas la junan Eklezion de Afriko!


VENU AL BUDAPEST!



Sankta Emeriko.

nombre al Budapeŝt, lernu de Sankta Emeriko, kiu, kvankam li jam mortis en aĝo de 23 jaroj, estis granda sanktulo, la amon al Dio kaj al la virtoj de la ĉasteco kaj karito, kaj festu kun katolikaj junuloj ĉiulandaj grandan feston de la frateco!

La hungara nacio festas en ĉi tiu jaro la 900-jaran jubileon de Sankta Emeriko, filo de Sankta Stefano, fondinto de la Sankta Krono de Hungarujo. Sankta Emeriko estas patrono de la hungara junularo, kiu ĝojos akcepti en aŭgusto nunjara la katolikan junularon tutmondan, por en amikeco kaj frateco festi kun ĉi la memoron de sia granda patrono. — La liston de la diversaj kongresoj okazontaj en Budapeŝt vi trovos en ĉi tiu numero. Ankaŭ okazos Katolika Esperanto-Kongreso, kaj en la solena procesio sur la Danubo veturos inter la ŝipoj de ĉiuj nacioj, kiuj salutas la Sanktan Sakramenton portatan de la Eksterordinara Papa Delegato, ankaŭ la ŝipo de la Esperantistoj. — Venu mult-



BUDAPEST

Parlamento

Taskoj kaj eblecoj de internacia kunlaborado de la katolika junularo.

De Wilhelm Solzbacher.

En la novembra numero de « Jugendführung » (junulgvado), pedagogia organo de la katolikaj junularaj asocioj de Germanujo, Wilhelm Solzbacher publikigis, komencante per raporto pri la MOKA-kongreso de Barcelona, longan artikolon kun principaj kaj praktikaj rimarkoj pri la internacia agado de la katolika junularo. Ni ĉi tie tradukas el ĝi la trian ĉapitron. Ĉar « Jugendführung » estas ĉefe legata de pastraj kaj pedagogiaj gvidantoj de la grandaj asocioj, la artikolo okupiĝas unuavice pri la eblecoj ekzistantaj por ili.

Kiaj do estas post la spertoj de la lasta tempo, ankaŭ de la kongreso de Barcelona, la **nuntempaj** taskoj kaj eblecoj por internacia kunlaboro de la katolika junularo?

Unue estas konstatote, ke la estraroj kaj sekretariejoj de la katolikaj junularasocioj en la diversaj landoj havas nur tre malperfektan kaj ofte tute nenan konon pri la laborado en aliaj, eĉ najbaraj landoj, kaj oni ĝis nun apenaŭ klopodis utiligi la valorajn spertojn, kiujn la frataj asocioj faris en la kampo de la **pedagogio, organizado kaj agado**, por la propra laboro. Sendube estas sufiĉe da kaŭzoj, por komenci pli bonan **intersanĝon de ideoj kaj spertoj**.

Mi nomas kelkajn diferencojn en la junulara pedagogio kaj junulara laboro, pri kiuj detala diskutado certe estus tre fruktodona.

En kelkaj landoj (ekz. Germanujo, Belgujo, Nederlando, Francujo) ekzistas diferencaj asocioj por la **vira kaj la virina junularo**, en aliaj (ekz. Ĉeĥoslovakujo, Jugoslavujo) la asocioj por junuloj kaj junulinoj estas komunaj, same kiel la lokaj grupoj, kaj la gazetoj (la tuta laboro estas mikseksa), en aliaj (ekz. Polujo) la asocioj estas komunaj, sed grupoj kaj gazetoj estas disigitaj. Kiajn spertojn oni faris pri la diversaj metodoj?

Gimnastiko kaj sporto en kelkaj landoj estas praktikataj en specialaj asocioj, kiuj parte ankaŭ mem zorgas pri la religia, kultura kaj ĝenerala agado (ekz. Ĉeĥoslovakujo, Francujo), parte tiun agadon lasas al aliaj asocioj (ekz. Nederlando), en aliaj landoj la sporto estas praktikata interne de la ĝeneralaj asocioj (ekz. Aŭstrujo, Hispanujo), en aliaj per organizaĵo speciale kreita en konekto kun la asocioj ĝeneralaj (ekz. Germanujo). En kelkaj landoj la gimnastikaj asocioj enhavas ambaŭ seksojn (ekz. Ĉeĥoslovakujo), en la plej multaj ili havas nur virajn membrojn, en aliaj (ekz. en Germanujo) tute aparte de la vira asocio ekzistas komitato por virina gimnastiko formita el la rondoj de la junulinaj asocioj.

En kelkaj landoj estis la tendenco, ke la ĝeneralaj junulaj asocioj formitaj sur la bazo de la paroĥo dividis sin en profesiajn subfederaciojn (ekz. Belgujo, nun ankaŭ montriĝas tiu tendenco en Francujo), en aliaj oni tre multe zorgas, ke oni **ne** dividi laŭ sociaj medioj, sed kunigu **ĉiujn** kiel paroĥa junularo (ekz. Germanujo, Aŭstrujo), kaj ekzistas tute sendependaj profesiaj asocioj.

En kelkaj landoj ĉiuj katolikaj junulaj asocioj estas severe kunigitaj en unu granda centra organizaĵo (ekz. Belgujo, Italujo) en aliaj ekzistas federativa laborkomunumo (ekz. Germanujo, Hispanujo), en aliaj (tio estas la plej multaj) tute nenia kunagado, sed rivaleco. En kelkaj landoj la organizaĵoj apenaŭ transpaŝis la kunigadon laŭ eparkioj kaj regionoj (tio valoras kun rezervo por Nederlando, Ĉeĥoslovakujo kaj Nordorienta Hispanujo).

La **skoltismo** en kelkaj landoj estas praktikata interne de la grandaj asocioj (ekz. Aŭstrujo, en Anglujo por la virina junularo), en aliaj ekzistas malforta aliĝo de la skoltoj al la ĝenerala asocio (ekz. en Belgujo), kaj parte la skoltaj asocioj estas tute apartaj (ekz. Hungarujo, Polujo, Francujo, Hispanujo, Usono), en Germanujo pro specialaj kaŭzoj la katolika skoltado estas apenaŭ evoluinta.

En kelkaj landoj ekzistas grupoj similaj al la germana « Jugendbewegung » (« junulmovado » en plej malvasta senco) kaj ĝia speciala karaktero (ekz. « Les Compagnons de Saint-François » en Francujo, aktivistaj junulaj kaj junulinaj ligoj en la flandraj partoj de Belgujo, nun ankaŭ nova movado en Nederlando), en la plej multaj io tia ne estas konstatebla.

En kelkaj landoj estas certaj religiaj ordenoj, kiuj okupiĝas pri la pastra prizorgado de la junularo. Ekz. en Hispanujo la jesuitoj gvidas la marianajn kongregaciojn, la franciskanoj la « Juventud Antoniana » (junulaj unuigoj de Sankta Antonio), la salesanoj la « unuigojn de estintaj alumnoj » kaj la « misian junularon »; en multaj landoj grupoj de la studanta junularo havas preskaŭ ekskluzive jesuitojn kiel pastrajn gvidantojn. En aliaj landoj neniaj tiaj kutimoj ekzistas.

En kelkaj landoj ĉiu okupiĝo pri politiko en la katolika junularo estas rigardata kvazaŭ herezio kaj peko kontraŭ la senco de la Katolika Agado (ekz. en Belgujo aŭ Italujo), en aliaj oni tute senskrupule okupiĝas pri politikaj aferoj kaj elektas politikajn komitatojn (ekz. La Nacia Komitato de la Katolika Junularo ĉe la Centra Partio en Germanujo).

Sen iu sistemeco kaj sen elparolado de prijuĝoj mi citis ĉi tiujn punktojn. Ili montru, kiom valoraj pri ili povus esti prudenta kaj detala internacia diskutado.

Kion ni bezonas por tio ?

Unue la intereson de la gvidantoj de la katolika junularo kaj de ĝiaj asocioj kaj ligoj. **Vizitoj en la sekretariejoj** de la frataj asocioj (pli valoraj ol belaj salutparoladoj en jubileoj kaj demonstracioj!), **intersanĝo** de artikoloj kaj klišoj, korespondado, **diskutaj konferencoj** en la maniero de tiu, kiun fine de junio MOKA okazigis por gvidantoj de belgaj kaj germanaj kaj kelkaj alilandaj junularaj asocioj en Louvain, studvojaĝoj, partopreno je laborkursoj (pli grava ol partopreno en la grandaj naciaj kongresoj!).

Sed tiu internacia laboro ne rajtas resti monopolo de la gvidantoj. Kiel eble plej multaj el la katolika juna popolo devas ricevi eblecon por komenci personajn rilatojn al junaj katolikoj trans la limoj. Kiel **metodojn** mi nomas: korespondado, libertempa intersanĝo, internaciaj vojaĝoj, partopreno je kongresoj, legado de eksterlandaj gazetoj kaj junularaj revuoj ktp. **Mondjunularo Katolika** penas kaj klopodas krei okazojn kaj praktikajn instituciojn tiucelajn. La asocioj kaj ligoj devus helpi ĝin en tio kaj atentigi siajn membrojn pri tiuj institucioj.

Certe ekzistas multaj malhelpoj, kiuj devus esti superataj; antaŭjuĝoj, naciista malvasteco, la malsameco de la lingvoj. Ankaŭ tie grandaj taskoj estas donataj. La **lingvaj konoj** devas esti praktikataj, kaj precipe kiel praktika internacia helpa lingvo **Esperanto** devus esti pli kaj pli disvastigata en la katolika junularo. Okazon al praktika utiligo donas la internacia korespondado per ĝi ebligata kaj la gazeto « La Juna Batalanto », kiu volas kaj devas fariĝi tribuno por internacia diskutado en la katolika junularo.

Ĉiuj ĉi tiuj aferoj povas esti farataj **nun** kaj ne bezonas grandajn preparojn. Se ni tiel laboradas, ni povos fari vere fruktodonan laboron, se **venos** la tago, por denove konstrui potencan katolikan junularan internacion kaj por revokigi la nun dormantajn internaciajn organizaĵojn.

Kaj ĉion ni faru sub la granda **katolika** ideo, kiu enhavas la idealojn de la paco kaj de la frateco, kiel junularo de la Tutmonda Eklezio, servante la realigon de la Regno de Dio inter la homoj !

LIBERAN STRATON - ANKAŬ POR NI!

Kiam ni faras kunvenojn, ni paroladas antaŭ maljunaj, lacaj, eluzitaj homoj. La aero estas silenta. Nenia kontraŭdiro. Multe da laŭkutimeco. Multe da trankvila ripozo. En la vizagoj kaj en la koroj. Multe da forsonanta vesperiga ruĝo. Multe da nokta silento. Sed en la okuloj de la junularo lumas la brulanta fajro. En streĉiteco kaj en revo. Mil konfuzaj kaj mil belaj kaj mil sovaĝaj pensoj en iliaj cerboj. Junularo staras malantaŭ la bariloj kaj rigardas en la stratojn. Sed ni iras laŭlonge de la stratoj kaj tamburas. Junularo, antaŭen!

Jen, je la alia flanko, la junularo staras je la ekstremajoj de la ribelanta, de la tremanta, de la tondranta lando. Ĝi marŝas kun la revolucio. Ĝi marŝas kun signoj sekrete kaŝitaj kaj malpermesitaj. Ĉirkaŭ kaŝbrulantaj fajroj kaj abismoprofunde vualitaj flamoj. Ĝi evitas la pordegojn kaj la kirasitan vojon. Ĝi iras tra mil intermortaĵoj. Super mil nigraj ŝtupoj al malhela brulo. Disbatu la ombrojn! Paŝu en la lumon! Leviĝu, junularo, al la paska fajro! Al la pentekosta flamo! Al la mistera brulotado de la pura virgulino en Bethlehemo nokto! Migru kun ni — supren ĝis la steloj! Portu kun ni la jubilantan standardon! Lasu sur viaj ŝultroj, viaj junaj, obstinaj, neeluzitaj ŝultroj, la eternan Kriston ree eniri en sian perditan regnon! Ekrigardu, junularo de la bariloj! Ni tamburas. Ni vokas. Marŝu kun ni, supren la straton de la mondo!

Pastro D-ro Carl Sonnenschein.

VIVU LA MILITO?

Oni legas el Sofia, ke la bulgara ĵurnalo « Utro » publikigas sub la titolo « Vivu la milito! » raporton pri parolado, kiun la generalo Jekof faris en la Militista Rondo de Sofia. Atakante la germanan libron de Remargue « En okcidento nenio nova » la bulgara ŝtatministro diras en defendo de la milito, « ke ĝi estas necvitebla necesajo en la vivo de la nacioj. Rezulto de la lasta milito estis la bedaŭrinda apero de la kontraŭmilitismo kaj de troigita pacifismo. Sed la milito bazita sur la altaj spiriritaj principoj — kaj ĝi vere povas esti bazita sur ili — estas historia necesajo por la ekzisto de la nacioj kaj por la morala virteco de la individuoj. »

Generalo Jekof forgesas — kvankam li ne estas la sola, kiu suferas je tiu forgesmalsano —, ke la Granda Milito estis prezentita al la popoloj kiel necesa por la gajnado de la paco kaj ankaŭ kiel lasta sanga konflikto inter la nacioj. Ŝtatistoj kaj militistoj ĉiuj interkonsentis en tiu diro certe iom naŭva, sed ĉiam denove sincere kaj solene ripetita en iliaj propraj alvokoj al plua batalado. Ĉu ĉiuj tiuj homoj estis troigitaj kontraŭmilitistoj kaj pacifistoj? Ĉu vere? Do mensoguloj?

Jes, fakte tio devas esti tia, ĉar, kiam estis la tasko, sendi en la batalkampojn milojn da homoj, konservi ilian bravecon kaj heroecon, fortigi la familiojn, sekigi larmojn, malpliigi dolorojn, unuvorte: rezisti, tiam vere oni ne publike proklamis la hodiaŭajn teoriojn, oni ne disvastiĝis tra la tranĉeoj, en la stratoj, en la domoj kaj domaĉoj, ke la milito estas historia necesajo por la ekzisto de la nacioj kaj por la morala vivo de la homoj. Kial oni do tiam ne diris, ke la milito estas nur fatala krizo ripetota periode por la pli granda bonfarto kaj forto de la popoloj? Ĉu ĉiuj estis troigitaj kontraŭmilitistoj kaj pacifistoj, kiuj tiam ne kuraĝis diri tion, kion oni hodiaŭ proklamas? Ĉu vere? Do mensoguloj?

Kiel oni vidas, generalo Jekof nur havas la elekton inter tiuj ambaŭ, troigitaj kontraŭmilitistoj kaj pacifistoj aŭ mensoguloj!

Laŭ « Osservatore Romano »,
Vatikano.

LA NOVA JARO de La Juna Batalanto komenciĝas per ĉi tiu numero. Ni invitas urĝe ĉiujn abonantojn, ke ili tuj pagu sian abonkotizon. Uzu tiun okazon ankaŭ, por pagi vian parton al la Jubilea Kolekto de J. B. ! Kaj ankaŭ por varbado de novaj abonantoj nun estas tempo. Pagu, helpu, propagandu!

LA FLAVA DANGERO.

Ni havas taskon universalan.

Ni? Kiu do? — Ni katolikoj.

Ekzistas unu miliardo da idolanoj. El tiu miliardo kvarcent milionoj estas ĥinoj. — Oni diras kelkfoje, ke tiu granda nombro da ĥinoj estas danĝero, — « la flava danĝero ».

Ĉu la « flava danĝero » ekzistas? — Estas certe, ke ĝi estas eltrovita de kelkaj grupoj dezirantaj havi motivon por interveni en la internaj aferoj de Ĥinujo. Guste tiuj, kiuj laŭtvoĉe kriadas: « Flava danĝero! Flava danĝero! » — estis tiuj, kiuj kaŭzis la situacion, el kiu tiel gravaj konfliktoj estiĝis. Ĉar la flavuloj minacitaj en sia sendependeco kaj atakitaj en sia indeco nun ekkriadis: « Blanka danĝero! Blanka danĝero! » — Tiamaniere estiĝas la militoj.

Ni havas taskon universalan, taskon pacigan, kaj en ĉi tiu kazo ni havas tre simplan ilon por plenumi ĝin.

Dekoj, centoj kaj miloj da junaj ĥinoj venas el sia malproksima lando al Eŭropo, por tie havigi al si pli altan intelektan edukadon kaj por povi pli bone servi sian patrolandon. Tio estas nobla idealo!

Ni do havas la eblecon veni en kontakton kun tiuj, kiuj morgaŭ estos la gvidantoj de Ĥinujo. Tiu kontakto havas nekalkuleblan gravecon.

Tiu kontakto devas esti simpatia, komprenema kaj ama. Ni havas okazon montri nin tiaj, kiaj ni estas kaj ni katolikoj povas doni al tiuj junuloj el la malproksima oriento vere grandan kaj malegoistan gastemecon. Jen granda atuto por la paco de la mondo!

Sed estas necese agi, ĉar la vortoj estas malbonaj, se la agoj ilin mensogigas. Ili devas vidi per niaj agoj, ke ni estas kristanoj. Ili devas vidi, ke oni ekkonas kristanon kaj katolikon je lia amo al la aliaj, al la fremduloj, al la vojaĝantoj, — kaj ke katoliko devas esti universala en sia pensado, en sia amo kaj en sia agado.

Ni montru, ke la Katolika Eklezio forigas ĉiun danĝeron, la « blankan » kiel la « flavan », ke ni, kiuj al ili parolas, estas katolikoj, kaj ke pro tio tute speciale ni ilin amas!

« La Vie Sociale » (Paris), 9 febr. 1930.

Persekuto de la religio en Rusujo.

Ĉu vi scias, ke la ikonoj estas brulitaj, la kalikoj kaj la sanktaj vazoj forrabitaj, la sonoriloj fanditaj, miloj kaj miloj da preĝejoj detruitaj? Ĉu vi scias, ke la metropolito de Kiev, Vladimiro, estas mortigita, ke la patriarko Tihon mortis post la torturoj, ke la metropolito de Petrograd, Benjameno, estas mortkondamnita; la ĉefepiskopo de Tobolsk, Ermogenes, alligita al la ŝraŭbo de vaporŝipo en movo; la ĉefepiskopo de Perm, Andromito, entombigita vivanta; la ĉefepiskopo de Solikan, Teoptano, letita vivanta en truan faritan en la glacien de rivero; la episkopo Ambrozio ligita al la vosto de ĉevalo kaj trenita tra la statoj de la urbo ĝis la plena dispecigo de lia korpo; ke la episkopoj kaj ĉefepiskopoj Mitrofan de Astrahan, Leonzio de Tsarev, Basilio de Ĉernigov, Joahimo de Nijnij-Novgorod, Nikodemo de Belgorod, Makario de Orloff, Laŭrencio de Balahnuinsk, Germano de Volsk, Pimenes de Vornen, Metodio de Pavlograd..... kaj miloj kaj miloj da pastroj kaj fideluloj estas martirigitaj kaj mortigitaj per la malamo kontraŭ Kristo?!

Laŭ « Osservatore Romano », Vatikano.

Gravaj Internaciaj Kongresoj kaj Kunvenoj 1930.

Kiel ĉiujare, MOKA kunmetis liston de gravaj internaciaj konferencoj, kongresoj, kunvenoj, tendaroj ktp. Tiu listo aperis en diversaj lingvoj kaj sinsekvaj eldonoj. Pri detaloj, programoj ktp. oni skribu al la citataj adresoj, generalaj informoj estas ankaŭ donataj de la internacia oficejo de MOKA, sed oni ĉiam aldonu duoblan afrankon aŭ du internaciajn respondkuponojn. La listo estas daŭrigota kaj kompletigota. De kelkaj arangoj la definitiva dato ankoraŭ ne estas fiksita. Ni speciale atentigas, ke la citado **ne** ĉiukaze signifas senrezervan rekomendon de la kongreso aŭ de la invitanta organizajo.

1-4 julio	Budapest (Hung.)	Internacia kongreso de katolikaj edukistoj kaj junulargvidantoj. Ferenciek-tere 7, Budapest IV.
5-12 julio	Oostduinkerke-sur-mer (Belg.)	Internacia Esperanto-Libertempo. BEA, 142 High Holborn, London W C 1.
12-13 julio	Altenberg (Germ.)	Internacia kunveno de katolikaj junulargvidantoj, precipe el Belgujo kaj Germanujo. MOKA, W. Solzbacher, Köln, Dagobertstr. 28, Germ.
19-26 julio	Nijmegen (Nederl.)	Internacia tendaro de Skolta Esperantista Ligo. Pastro C. Preller O. P., Broerskerk, Nijmegen.
17-29 julio	Arnhem (Nederl.)	Internacia Pedagogia Esperanto-Kurso de Pastro Ĉe. Julia Isbrücker, Oostduinlaan, 32, Den Haag, Ned.
26 julio	Daugaardstrand ĉe Veilefjord (Danujo)	Internacia Junulara Kunveno. International Ungdoms Liga, Postbox 122, København K, Dan.
28 julio	Marseille (Franc.)	Sociale Semajno de la francaj katolikoj. Temo : la socia problemo en la kolonioj. Secrétariat des Semaines Sociales, Rue du Plat, Lyon, Ĉestos eksterlandaj gastoj.
Aŭgusto	Innsbruck (Aŭstrujo)	X-a Internacia Katolika Kongreso de IKA. Msgr. Dr. N. Pfeiffer, Tovarna U. 3, Košice, Ĉeĥoslovakujo.
2-9 aŭgusto	Oxford (Anglujo)	22-a Universala Kongreso de Esperanto. 142. High Holborn, London W C 1.
Aŭgusto	London	Internacia Proletaria Esperanto-Kongreso (SAT). SAT, 23, Rue Boyer, Paris XX., Francujo.
3-10 aŭgusto	Freusburg (Germ.)	Internacia Junulara Kunveno. Hedwig Eichbauer, Hamm/Sieg, Germ.
Aŭgusto	Chevreuse (Franc.)	Internacia Junulara Tendaro. Trait d'Union, 73-bis, Rue Bobillot, Paris XIII.
4-8 aŭgusto	Liège (Belg.)	IV-a Internacia Kongreso por Infaneduko en la Familio. 44 Rue Rubens, Bruxelles, Belg.
16-21 aŭgust.	Budapest (Hung.)	Internacia Kongreso de Katolika Junularo. Ferenciek-tere 7, Budapest IV. (Grave : sama adreso por ĉiuj aliaj arangajoj en Budapest!)
16-21 aŭg.	Budapest	Internacia Katolika Esperanto-Kongreso (IKUE). Postafio 203, Budapest.
17-19 aŭg.	Budapest	Int. Konferenco de « Unio Cleri pro Missionibus » (Pastra Unuiĝo por la Misioj).
17-18 aŭg.	Budapest	Int. Katolika Konferenco kontraŭ la Alkoholismo. Hoheneck-Zentrale, Puttkamerstr. 17, Berlin.
18 aŭgusto	Budapest	Int. Kat. Virina Konferenco.
18 aŭgusto	Budapest	Jubileo festo de la katolika studenta asocio Foederatio Emericana kun paroladoj de reprezentantoj de ĉiulandaj universitataj ligoj.

19 aŭgusto	Budapest	Eŭkaristia Kongreso kun internacia ĉeestantaro.
20-23 aŭg.	Budapest	Internacia kongreso de marianaj kongregacioj.
21-23 aŭg.	Budapest	Int. konferenco de kat. parlamentanoj, verkistoj kaj fakuloj pri internacia juro.
21-23 aŭg.	Budapest	Int. kongreso de katolikaj kuracistoj. Temo : Seksa etiko.
21-26 aŭg.	Budapest	Internacia katolika socia semajno.
21-26 aŭg.	Budapest	Internacia katolika literatura semajno. Po unu vespero por la diversaj lingvogrupoj.
20-30 aŭg.	Novy Targ (Polujo)	Orienteŭropa junulara kunveno. Kaspar Mayr. Wien VII., Döblergasse 2/26.
Aŭgusto	Ljubljana (Jugoslav.)	Internacia katolika misia kongreso.
26 aŭgusto	Como (Ita-)	Internacia Esperanto-Festo. BEA, 142 High Holborn, London WC 1.
-3 septembro	lujo	
24 aŭgusto	Bierville (Franc.)	X-a Internacia Demokrata Paca Kongreso (de Marc Sangnier). La Démocratie, 34 Bd. Raspail, Paris VI.
-7 septembro	-Ostende-Bruxelles-Antwerpen-Liège.	
30 aŭgusto	Salzburg	Kunveno de la Katolika Akademiana (universitata kaj intelektula) Asocio kun eksterlandaj gastoj. Temo : Kristo en la profesia vivo de la moderna homo. Kath. Akademikerverband, Köln, Altenbergerstr. 14, Germ.
-3 septembro	(Aŭstrujo)	
31 aŭgusto	Bruxelles	Internacia Katolika Gazetara Kongreso.
-4 septembro	(Belg.)	
Septembro	München-Köln (Germ.)	X-a Internacia Kongreso de Pax Romana (Kat. univ. stud.). P. R., Abbé Grémaud, Gambach, Fribourg, Svisujo.
4-7 septemb.	Münster (Germ.)	Germana « Katholikentag » (Katolika Kongreso) kun eksterlandaj gastoj.
8-10 sept.	Paderborn (Germ.)	Kongreso de Katolika Paca Ligo kun eksterlandaj gastoj. F. d. K., Kuratus Hintz, Berlin NW 6, Schumannstr. 9-II.
fine de septembro	Athenai (Grekujo)	Internacia paca konferenco por la balkanaj landoj. Bureau International de la Paix, 8 rue Ch. Bonnet, Genève, Svisujo.

Krome ni atentigas pri :

la Mondekspozicioj en Liège kaj Antwerpen okaze de la Centjara Sendependeco de Belgujo. En Liège nia amiko René Jurdant kun siaj amikoj el la A. C. J. B. (Asocio Katolika de la Junularo Belga) konstruis belan pavilonon nomitan « le grand restaurant ». Grupoj, vizitantaj ĝin komune, ricevos 25-procentan rabaton;

la Pasio-ludoj en Oberammergau; la Internacia Fratara por Repacigo sub gvido de niaj amikoj Kaspar Mayr kaj Donald Grant luis belan domon kun multe da litoj, arangante internacian somerrestadejon. La domo estas je la dispo de niaj geamikoj vizitontaj Oberammergau. Aligoj estu sendataj al Kaspar Mayr, Wien VII., Döblergasse 2/26.

ESPERANTO-LITERATURON je eksterordinare malaltaj prezoj vi povas aĉeti per la eldonejo **LA JUNA BATALANTO**. I. a. ni vendas la plej famajn romanojn originale verkitaĵojn en Esperanto je prezoj konsiderinde pli malaltaj ol la oficialaj. Nur malgranda kvanto ! Mendu tuj la prezaron de la eldonejo!

la festsoletoj en Budapeŝto je la 900-jara jubileo de Sankta Emeriko; invitiloj kaj programoj haveblaj de la prepara komitato, Ferenciek-tere 7, Budapeŝto IV. Geamikoj el okcidenta kaj centra Eŭropo estu atentigitaj pri la kongresa karavano de la vojaĝagentejo « Dux », institucio de la belga katolika junularo, en kiu partoprenos Esperantistoj kaj kiu invitas eksterlandajn Esperantistojn al partopreno. Adreso: 48-a rue Vital De-coster, Louvain, Belgujo;

la internacia helpservo por la akvodetrinitaj regionoj de Suda Francujo. Adreso: Pierre Cérésolle, lycée, LA-CHAUX-des-Fonds, Svisujo;
la Mondjunulara Migrada Servo: adreso: Hedwig Eichbauer, HAMM/Sieg, Germ.

la grupvojaĝoj de la germana asocio de MOKA al Belgujo kun vizito de la ekspozicioj en Liège kaj Antwerpen; adreso: Heinz Kolvenbach, Düsseldorf, Stoffeln 23;

la Internacia Ekspozicio de Higieno en Dresden, Germ.;

la eksterlandvojaĝoj jam anoncigitaj en la marta numero de J. B.

JUBILEA KOLEKTO DE J. B.

Unua listo de donacintoj: Pastro St. en B. (per W. S.) 35.— RM, A. B. en K. 0.50 RM, R. R. en K. 10.— RM, A. Th. en W. 7.— RM, Pastro J. B. en K. 2.— RM, G. S. en St. 2.— RM, la sama (dua pago) 3.— RM, H. T. en K. - R. 1.—RM, B. M. en H. 5.— RM. Sumo: 65,50 RM.

Ni rememorigas, ke ni okazigas ĉi tiun kolekton okaze de la dekjara ekzisto de nia MOKA-movado, por helpi nian internacian organon J. B. Ĝis nun nur tre malgranda nombro de niaj geamikoj sendis sian obolon. Ni tutkore dankas tiujn, kiuj bonvolis helpi nin, kaj invitas la aliajn, ke ankaŭ ili ne forgesu nian karan gazeton. Dio rekomencu ĉion!

Eldona Kooperativo J. B.

Nia Movado.

Internacia Oficejo.

Oficiala internacia kunveno de MOKA en ĉi tiu jaro ne okazos. Ni estis intencintaj aranĝi internacian kurssemajnon en Vieno, sed niaj vienaj amikoj sciigis nin, ke en ĉi tiu jaro ili ankoraŭ ne povas fari la necesajn preparajn laborojn. Ni do invitas ĉiujn MOKA-anojn, partopreni en almenaŭ unu el la multaj internaciaj kongresoj, kies listo troviĝas en ĉi tiu numero. En kelkaj okazos specialaj fakaj kunsidoj de MOKA.

Ekzekutiva komitato. Pro tro grandaj profesiaj laboroj malhelpantaj ilian laboradon en la komitato ekzistis Josef Grundhoff (Barmen) kaj Carl Degen (M.-Gladbach). Ni dankas ilin pro iliaj bonaj servoj faritaj al nia movado. — Proksima kunsido de la ekzekutiva komitato: 25 majo en Velbert (Rejnlando).

Aŭstrujo.

La nacia sekretario Ernst Görlich, kun bedaŭro sciigante, ke li nun pro troaj profesiaj laboroj ne plu povas tiom agadi por MOKA kiel ĝis nun, deziras transdoni sian oficon al alia laborema MOKA-ano. Li proponas Walter Mudrak Niaj aŭstraj geamikoj baldaŭ interkonsentu pri tio!

« Kalasantiner-Volkskalender », popola kalendaro eldonita en Vieno de la religia societo de la kalasantinoj, enhavas en sia eldono por 1930 ankaŭ dupaĝan raporton pri la Esperanto-laboro en tiu societo kaj fotografajon de la Kalasantina Esperanto-Grupo en Vieno. I. a. ĝi skribas, ke Esperanto tie estas enkondukita per MOKA: « En la Esperanto-movado denove ekfloranta kun nova forto post la milito kelkaj katolikaj Esperantistaj rondoj komencis, repensante pri la terura hombuĉado, propagandi Esperanton kiel ilo por la interpaco kaj interkomprenigo de la popoloj. Tiel estigis la ligo Mondjunularo Katolika, kiu akceptis en sia celado Esperanton kiel helilo por la interirato de la homaro. En la jaro 1921 tiu internacia katolika junulara movado, precipe pro ĝia pacifista sinteno, vekis viglan intereson ĉe kelkaj lernantoj de la Kalasantina Instituto por metilernantoj, kaj oni komencis studi Esperanton. 1922 la Patro Generalo permesis okazigon de Esperanto-kurso... » Pri la simpatio de la fondinto de la kalasantinoj, Pastro Anton Maria Schwartz mortinta en la lasta jaro, al Esperanto J. B. jam raportis en artikolo de Walter Mudrak.

« Heilig Feuer » (Sankta Fajro), buleno de la Katolika Krucligo, eldonata de aliaj kunlaborantoj D-ro Hloucha kaj Mudrak, denove publikigis efikajn propagandartikolojn por Esperanto kaj por la katolika paca movado.

Belgujo.

La internacia sekretario de MOKA en aprilo kaj majo estis denove dufoje en la lando, vizitante geamikojn. Li ankaŭ partoprenis la Studsemajnon por gvidantoj de la Asocio Katolika de la Junularo Belga (A. C. J. B.) en Florefe kaj la kunvenon de la ĝenerala konsilantaro de la A. C. J. B. en Namur. En ambaŭ kunvenoj li estas akceptita kun granda frateco kaj simpatio, en Florefe li ankaŭ faris paroladon.

Brazilujo.

Anonciĝis novaj simpatiantoj kaj kunlaborantoj. Ni esperas, ke baldaŭ ankaŭ en tiu lando ekprosperos nia movado.

Germanujo.

La nacia sekretario (Heinz Kolvenbach, Düsseldorf, Stoffeln 23) dissendis cirkuleron al la delegitoj.

Estas preparataj vojaĝoj de MOKA al Belgujo kun vizito de la Internacia Ekspozicio en Liège kaj Antwerpen. Skribu al nacia sekr. Kolvenbach!

MOKA per Radio. La 14 majo Wilhelm Solzbacher faris 20-minutan paroladon disaŭditan per la okcidentgermanaj radio-stacioj Köln, Langenberg, Aachen kaj Münster, pri la temo: « Pri eksterlandaj vojaĝoj, mondkongresoj kaj internaciaj tendaroj de la junularo ». Tre detale li parolis pri la agado de MOKA, pri la neceseco kaj utileco de Esperanto, la signifo de nia gazeto « La Juna Batalanto ».

Multaj jurnalaj kaj gazetaj publikigis notojn kaj artikolojn pri nia movado. El la lasta tempo ni nur citas « Der Friedenskämpfer », organo de la katolika paca movado, kun tutaĝa anonco pri La Juna Batalanto, « Missionsblätter », bulteno de la benedik-tana misiistoj de Schweiklberg (kiu publikigis sepaĝan anoncon por J. B.), « Jugend-führung » (publikiginta en siaj numeroj de februaro kaj marto la longan artikoloserion el J. B. pri « Internacia Junulara Agado »), « Die Junge Schar » (daŭra Esperanto-kurso kun atentigoj pri J. B.), « Vom frohen Leben » (anonco pri J. B.), « Essener Volkszeitung » (artikolo de Peter Klein pri MOKA), « Katholische Korrespondenz » (grava katolika gazetara servo represita de centoj da jurnalaj, ĝi publikigis noton pri la katolikaj Esperanto-gazetoj, en ĝi unuavice rekomendante nian J. B.), « Der Durchbruch » (alia grava gazetara servo disvastiginta la informon pri la beno de la Sankta Patro al nia MOKA-movado).

Düsseldorf. Parolado de verkisto D-ro Kosučnig el Trieste en la MOKA-grupo pri « Pasismo, junularo, mondpano ». La kursoj gvidataj de Heinz Kolvenbach bone progresas. — La lokan grupon nun gvidas Conrad Thoonen, Behrenstr. 28.

Koeln. « Ekaro » (Esperantista Kolpingana Aro) estas la nova nomo de la iama Esperanta Klubo en Kolping-Domo. En aprilo okazis grupa festo kun Esperanto-kantado, disdonado de premioj al la plej bonaj sukcesintoj de la ĵus finita kurso de Xaver Saur kaj festparolado de Wilhelm Solzbacher pri « la praktika signifo de Esperanto por nia katolika junularo ». La prezidanto Max Henrichs tre rekomendis la abonadon al J. B. — W. Solzbacher faris publikan paroladon pri « Junulara Laboro sur la Freus-burg-Kastelo » antaŭ kelkcentnombra ĉeestantaro.

Hinujo.

La nacia sekretario Pastro Joh. Bapt. Kao denove povas raporti pri bonaj progresoj. Estas decidite, estonte eldoni la hin- kaj Esperantlingvan propagandan gazeton « Matena Stelo » /Sio-Ming-Sing kvaronjare en Shanghai. Por la dua numero ĉi jam kolektis pli ol 50 dolarojn. La administradon gvidos nia kunlaboranto Nicolas Tchang-Ke-Fang en la Katolika Universitato « Aŭroro » en Shanghai. El tiu gazeto oni volas fari imponan kaj interesan katolikan gazeton, kiu povos interesigi kaj varbi gravajn rondojn al la ideoj de MOKA Esperanto ktp. — Nia nacia sekretario Kao venos kredeble en ĉi tiu jaro al Eŭropo, por studi en la Universitato de la Franciskana Ordeno en Romo. Tiam li havos okazon persone interkonatiĝi kun eŭropaj gesamideanoj. La hina MOKA-laboro tamen, kiel nia sekretario sciigas, ne suferos pro lia foresto, ĉar nun jam laboras en Hinujo sufiĉe kapablaj kaj fervoraj kunhelpantoj.

En Tung-Yuen-Fang nun la tuta seminariano lernas Esperanton.

Leterkesto.

Ĉi-tiu numero devus enhavi gravajn raportojn pri la multaj novaĵoj el la katolika junularo, ekz. pri dekduo da kongresoj okazintaj en la diversaj landoj. Bedaŭrinde mankas la loko. Ni tamen enpresas du tre signifajn paroladojn, kiuj estas faritaj en du el la plej signifaj el tiuj kongresoj : tiun de P. Erich Przywara S. J. faritan en la Kongreso de la Katolika Junularo de Germanujo kaj tiun de Marc Schérer faritan en la Kongreso de la Katolika Junularo de Francujo. La unua skizas la spiritan situacion de nia tempo, la dua la socialan situacion. Ambaŭ raportoj ne estas facile legeblaj kaj kompreneblaj, kaj sendube denove alvenos plendoj, ke nia gazeto estas «tro serioza». Sed ni ja ne estas amuza ĵurnalo. Do, se vi ne komprenas tuj, legu du-, tri- aŭ kvarfoje! Vi certe ne pentos!

La sekvontan numeron ni intencas eldoni en formo, kiu faras ĝin speciale taŭga por disdoni en internaciaj kongresoj, kiaj ja tre multaj okazos en aŭgusto kaj septembro.

Al G. S. en S. « Heroldo de Esperanto » bone informas pri ĝeneralaj progresoj de la Esperanto-movado. Oni ne povas nei, ke ĝi sincere klopodas esti « neŭtrala », kvankam en tio ĝi ne ĉiam sukcesas. Mi rekomendas al vi : Legadu ĝin, sed ne senkritike! — Aliĝo al UEA estas rekomendinda. — Kompreneble katoliko devus ĉiam unuavice subteni la katolikan movadon.

Al H. G. en M., C. Th. en D. k. a. La internacia sekretario ne scias, kiel la subskribo de MOKA venis sub la propagandilon de tiu entrepreno. Eble la persona subskribo de nia protektoro episkopo Majlath kredigis al la firmo, ke ĝi ankaŭ povas publikigi rekomendon de MOKA. Cetere mi estas plene konvinkita, ke nek Msgr. Majlath nek Msgr. Deitmer, episkopo de Berlino, kies subskribo ja ankaŭ troviĝas sur la folio, iam donis senrezervan rekomendon, eble ili nur rekomendis iun aŭ alian Ebron eldonitan de D. B. Mia persona opinio : Aliĝo estas rekomendinda kun rezervo. Al katolikoj kun nesufiĉa filozofia kaj literatura klareco aliĝo estas danĝera. Kaj ankaŭ ĉi tie : Unuavice subteni la katolikajn instituciojn!

Al multaj sendintoj de manuskriptoj. Bonvolu iom pacienci. Al ni mankas la loko!

W. S.

Nepre ĉiuj Esperantistoj kaj E-entreprenej

aliĝu al 9-a eldono de

BES-ADRESARO

Simpla aliĝo 0 50 Fsv

kun adresaro 1 Fsv, kun adresaro kaj portreto 1 50 Fsv

BES - Adresaro, Potštejn, — Ĉeĥoslovakujo.